

AUGLÝSING

um staðfestingu reglugerðar fyrir Tónlistarskóla Stykkishólms.

1. gr.

Með vísan til 2. gr. laga um fjárhagslegan stuðning við tónlistarskóla, nr. 75/1985, staðfestist hér með reglugerð fyrir Tónlistarskóla Stykkishólms, sem samþykkt var af bæjarstjórn Stykkishólms hinn 31. janúar 2019 og birtist sem fylgiskjal með auglýsingu þessari.

2. gr.

Auglýsing þessi öðlast þegar gildi.

Mennta- og menningarmálaráðuneytinu, 15. júlí 2019.

Lilja D. Alfreðsdóttir.

Karítas H. Gunnarsdóttir.

Fylgiskjal.

REGLUGERÐ fyrir Tónlistarskóla Stykkishólms.

1. gr.

Skólinn heitir Tónlistarskóli Stykkishólms. Skólinn er eign Stykkishólmsbæjar og fer bæjarstjórn Stykkishólms með yfirstjórn hans. Skólinn starfar skv. lögum um fjárhagslegan stuðning við tónlistarskóla nr. 75/1985 með síðari breytingum.

2. gr.

Hlutverk og meginmarkmið skólans er að efla hæfni, þekkingu og þroska nemendanna, og stuðla að öflugu tónlistarlífi í Stykkishólmi. Kennsluáðferðir og viðfangsefni skulu vera í samræmi við gildandi aðalnámskrá og skólanámskrá hverju sinni.

3. gr.

Markmiðum sínum skv. 2. gr. hyggst skólinn meðal annars ná með því:

- Að annast kennslu í hljóðfæraleik og söng ásamt kennslu í öðrum tónlistargreinum eftir því sem aðstæður leyfa.
- Að búa nemendum fjölbreytt skilyrði til að þroska tónlistarhæfileika sína og sköpunargáfu.
- Að leggja áherslu á félagslegt gildi tónlistariðkunar með þátttöku nemenda í samleik, kór- og hljómsveitarstarfi.
- Að búa nemendur undir áframhaldandi nám í tónlist.
- Að gera fullorðnum kleift að auðga tímstundir sínar með tónlistariðkun, eftir því sem kostur er.

4. gr.

Bæjarstjórn skipar fimm manna skólanefnd og jafnmarga til vara til fjögurra ára í senn að loknum sveitarstjórnarkosningum. Skólanefnd hefur umsjón með málefnum skólans í umboði bæjarstjórnar og starfar eftir samþykktu erindisbréfi nefndarinnar. Formaður skólanefndar boðar til fundar með dagskrá svo oft sem þurfa þykir.

Skólastjóri eða staðgengill hans situr fundi skólanefndar og hefur þar málfrelsi og tillögurétt.

5. gr.

Bæjarstjórn ræður skólastjóra. Skólastjóri ræður kennara og aðra starfsmenn. Við ráðningu skal þess ávallt gætt að bæjarstjórn hafi samþykkt stöðuheimildir.

6. gr.

Skólastjóri fer með daglega stjórnun skólans og hefur forystu um að móta listræna og faglega stefnu skólans. Hann ber ábyrgð á að skólastarfið sé í samræmi við reglugerð þessa og námskrár og reglur sem í gildi eru um tónlistarskóla í landinu á hverjum tíma. Skólastjóri skal sjá um daglega umsjón skólamannvirkja samkvæmt nánari ákvörðun bæjarstjórnar og getur bæjarstjórn í samráði við skólastjóra ráðstafað skólahúsnæði öllu eða hluta þess til annarrar starfsemi svo fremi sem það hafi ekki teljandi áhrif á starfsemi skólans. Skólastjóri skal ganga frá vinnuskýrslum starfsmanna til launafulltrúa Stykkishólmsbæjar, árita reikninga til greiðslu og annast skráningu nemenda og skólagjalda. Skólastjóri kemur fram fyrir hönd skólans gagnvart starfsmönnum, nemendum og foreldrum þeirra svo og aðilum utan skólans. Næsti yfirmaður skólastjóra er bæjarstjóri.

7. gr.

Skólastjóri skal gera áætlun um kennslustundafjölda og kennslutilhöggun næsta skólaárs og leggja fyrir skólanefnd til afgreiðslu. Skal áætlun þessi taka mið af þeim stöðuheimildum sem skólinn hefur. Áætlunin verði síðan lögð fyrir bæjarstjórn til samþykktar.

8. gr.

Kennarafundi skal halda eftir því sem þurfa þykir, þó ekki sjaldnar en fjórum sinnum á starfstíma skólans. Skólastjóri boðar til kennarafunda með dagskrá og skulu fundir skráðir í bók. Skylt er öllum föstum kennurum skólans að sækja kennarafundi. Skylt er stundakennurum að sækja kennarafund ef skólastjóri æskir þess, enda sé boðið til fundarins með a.m.k. þriggja daga fyrirvara.

9. gr.

Rekstur skólans skal kosta með fjárveitingum á fjárhagsáætlun Stykkishólmsbæjar og skólagjöldum nemenda. Skrifstofa Stykkishólmsbæjar annast greiðslu launa og rekstrarreikninga svo og bókhald Tónlistarskóla Stykkishólms.

10. gr.

Skólagjöld eru ákveðin af bæjarstjórn Stykkishólms að fengnum tillögum skólanefndar. Skólagjöld skulu greidd fyrrihluta hverrar annar og annast skrifstofa Stykkishólmsbæjar innheimtu þeirra. Hækkun gjalda skal ætíð miðast við upphaf skólaárs.

11. gr.

Starfstími Tónlistarskólans er sá sami og Grunnskólans í Stykkishólmi og skal skóladagatal hvers skólaárs taka mið af dagatali Grunnskólans, eftir því sem kostur er og skulu vetrarleyfis dagar vera þeir sömu. Um laun, viðverutíma og vinnuskyldu skólastjóra og kennara fer eftir gildandi kjarasamningi milli Félags tónlistarskólakennara og Félags íslenskra hljómlistarmanna annars vegar og launafundar sveitarfélaga hins vegar.

12. gr.

Rétt til skólavistar hefur hver sá íbúi Stykkishólmsbæjar eða sveitarfélaga sem gert hafa þjónustusamning við Stykkishólmsbæ í þessu sambandi, innan þess ramma sem stöðugildi innan skólans og fjárveiting til hans gefur. Kennslufyrirkomulag og námsframboð skal auglýsa við innritun.

Þurfi að takmarka fjölda nemenda á einstökum námssviðum er skólanum m.a. heimilt að beita hæfnisprófum og breyta auglýstu kennslufyrirkomulagi.

Heimilt er skólastjóra að vísa nemanda frá námi ef hann hefur ekki sinnt því um lengri tíma eða hefur gerst brotlegur við reglur skólans og ekki látið skipast við áminningu.

Ef umsækjandi sækir um nám á fleiri en eitt hljóðfæri er skólastjóra í samráði við kennara heimilt að meta umsóknina út frá fyrri ástundun nemandans. Úrskurðum skólastjóra má skjóta til skólanefndar.

13. gr.

Reglugerð þessi er samþykkt af bæjarstjórn Stykkishólmsbæjar 31. janúar 2019.